

फिलिप्पीला तेपा कितुपतिवाला पावलकी टिवु यिकी

दी थेपकी कोर्ला

दी यिकी ति पावलकी फिलिप्पी ग्येसाकी चर्चला तङ्गुप यिन। फिलिप्पी ति माकेडोनिया सिरुप रोमी लुङ्बाकी ग्येसा च्यिक यिनोक। दी यिकी टिकुप पेला पावल चोन्खाडला शोर्नोक। माङ्शोक ख्रीष्टियानतिवी पावलकी तेन्दोकला लानी दुक्पा बिन्नोक। ती पेला फिलिप्पीकी चर्चला लेन मेटेङ्बु ख्याप्ताक कितुपतिवा साङ नोक। ती तप्की पावलला छासे पप लानोक। यिन्सिनाङ पावलला गा नोक। ती ति तीकी ख्रीष्टला नरी तेपा क्यावु तप्की यिन।

पावलकी दी यिकी टिकुप खक्छ्येवु तेन्दोक ति फिलिप्पीकी ख्रीष्टियानतिवाला थुचिछे सिरुपला यिन। च्यिलासिसिन तिवी पावलला कतुकार ख्येलुप पेला बुल्वातिवा कल ताङ्नोक। ती कोकापला पावलकी खोरुङला ख्येलुप दुक्पा ताङ तिवाला ख्येलुप दुक्पाकी पेला तिवाला डाडेङ ताङ रेवा तेरुपला दी यिकी ति टिवु यिन। पावलकी तिवाला खुरुङला तिराङ नासाम तङ्नी डराङ यिन सिरुप मिजी माक्याङ्नी येशूकी दोके कुसु ज्यम्बु वोतुप किताङ नालु लोप्शी सिनी टोङ्गु तेर्किवी। ख्रीष्टला वोतुपतिवी मिजी ति कोन्छ्योककी कटिन यिन। ती कटिन ति तिवी यहूदी ठिमकी लुकसुतिवा तेन्नी थोपुप मिन, यिने तिवी क्यावु तेपा नेसुर थोपुप यिन सिनी तिवाला टेन्सो लोङ्गिगी। येलुङ पावलकी तिवाला ख्रीष्टला तेपा क्यानी मिजी क्योङ्गुपतिवाला कोन्छ्योककी गा ताङ लोदिमु नङ्गिगी सिनी टि वे।

दी यिकीला ख्रीष्टियानकी तेपा ताड तिवी मिजीला ड्येतुप गा ताड सेम थिन्दुप ताड लाका क्या क्यावा देतुप कोर्ला सिक्यावु तप्की यम्बा यिकी सिनाड कुतुक थोङ्गिगी। दी यिकीला ल्हासिन फिलिप्पीकी चर्चला पावलकी चो ड्यङ्ज्ये किनोक सिरुप ति हाक्कोकिवी।

मुला राड वोतुप लोप्च्येनतिवा

- पावलकी डोशी १:१-११
- पावलकी छेटाड १:१२-२६
- ख्रीष्टला वोतुप मिजी १:२७-२:१८
- तिमोथी ताड इपाफ्रोडिटसकी थोकला नोवा २:१६-३०
- तेन्दोकला लङ्गुपतिवा नेसुर ज्होकुपला टोङ्गु ३:१-४:६
- पावल ताड फिलिप्पी दाल्जातिवा ४:१०-२०
- यिकी सिन्दा क्यावु ४:२१-२३

१ टसी देलेक! दी यिकी ति ख्रीष्ट येशूकी थोक्ला शब्ज्यी कितुप ड पावल ताड तिमोथी नेसुर फिलिप्पीला वोतुप येशूला तेपा कितुप मीतिवा तेरी ताड चर्चला गोमा कितुप मीतिवा ताड चर्चला ल्हाटे कितुप मीतिवाला टिवु यिनो। २ दाक्पी पपा कोन्छ्योक ताड चोवो येशू ख्रीष्ट नेमा ख्यिराडला कटिन ताड लोदिमु वुडशी।

पावलकी फिलिप्पीतिवी थोक्ला मोपोर क्यावु

३ नाम्साड ख्यिराडला टेन्दुप पेला ड डे कोन्छ्योकला थुचिछे बुलिन। ४ तमा ख्यिराड तेरीकी थोक्ला ड मोपोर कितुप पेला नरी कोन्छ्योकला सेम गा क्यानी मोपोर कितिन। ५ च्यिलासिसिन ख्यिरा गोमाला येशू ख्रीष्टकी लेन ल्यामु थोवु पेला नेज्यु तन्दा सेक ती लेन ल्यामु ख्याप्टाक कितुपला ड ताड मुला दाल्जा किटे क्यासुड। ६ तमा ख्यिरा मिजीला लाका ल्यामु गो जुवु कोन्छ्योककी राड येशू ख्रीष्ट फेवु तुजे सेक ख्यिरा मुला ज्युनी ती लाका ति सिन्दा किवी सिरुप ति डला तेपा वे।

७ ख्यिराड तेरीकी थोक्ला डे दी नासाम तङ्गुप ति टेके यिन। च्यिलासिसिन तसाम ड चोन्खाडला वोतुप पेला ताड चोन्खाड नेमा तेन्नी लेन ल्यामु ख्याप्टाक कितुप ताड तीला तेन्तेन कितुप पेला कोन्छ्योककी

नङ्गुप कटिनला ख्यिरा ड ताड मुला लाका क्यासुड। तुक क्यानी ख्यिराडला नरी डे सेमला ज्याड वे। ८ येशू ख्रीष्टकी सेम दोके ख्यिराड तेरीला ड छासे नासाम शर्नी ठेतुपला गा लासुड। दी ताम्डे ति टेड्बु यिन। तीकी थोक्ला कोन्छ्योक पड्बु वे।

९ ख्यिरा रिक्पा ताड ल्यामु मेलोवा काड यिन सिरुप ति हाक्कोनी ख्यिरा ड्यिङ्ज्ये ति मड मड फेलिन डोशी सिनी ड मोपोर कितिन। १० तुक क्यानी चुका ताम्डे ति खक्छ्येवु यिन ति ख्यिरा बे थुप्शी। तमा ख्रीष्ट फेवु तुजे सेक ख्यिराड क्येन मेतुप ताड टेड्बु क्यानी दे थुप्शी। ११ तमा येशू ख्रीष्ट नेमा वुङ्गुप टेड्बुकी ख्यिरा मिजीला डेलु गरुप दोके छाछिडी च्युङ्नी कोन्छ्योकला मोवा कितुप ताड सोवा देकुप च्युड थुप्शी।

पावलकी छेटाड नेसुर लेन ल्यामु फेलुप

१२ अच्युनुपतिवा, ख्यिराडला दी ताम्डे ति ल्यामु हाक्कोशी सिरुप ति डे नोवा वे। काड यिन सिसिन डला छेटाड ख्येलुप तप्की राड लेन ल्यामु ख्याप्टाक कितुप लाका मड च्युङ्नी वे। १३ च्यिलासिसिन ख्रीष्टकी कोर्ला सुड ख्याप्टाक क्यावु तप्की ड चोन्खाडला शोरुप यिन सिरुप ति रोमी ग्येल्खाडला ज्हेन्दुप मक्मीतिवा ताड यम्बा मीतिवा तेरीला छ्या वे। १४ ड चोन्खाडला शोर्सिमा माङ्शोक

तेपा कितुप अच्युनुपतिवा डार छ्येवु गल्नी कोन्छ्योककी सुड डाडेड क्यानी ख्याप्ताक क्यासुड।

१५ वुतुड के ललाइ अच्युनुपतिवा ति ठतोक लानी खाँदा कियी सिरा लेन ल्यामु ख्याप्ताक क्यासुड, ललाइकी नासाम ल्यामो तङ्नी ख्रीष्टकी कोर्ला लेन ल्यामु ख्याप्ताक क्यासुड। १६ नासाम ल्यामो तङ्नी लेन ल्यामु ख्याप्ताक कितुपतिवी कोन्छ्योककी लेन ल्यामु ज्होकुपला राड ड चोन्खाडला शोरुप यिन सिरुप हाक्कोनी डियङ्ज्ये लानी ख्याप्ताक क्यासुड। १७ यिने ठतोक लानी खाँदा कितुपतिवी डला चोन्खाडला मड छेटाड इयेशी नोनी सेम टेङ्बु क्यानी मिन, यिने खोरो थोकला तिराड नासाम ताङ्नी ख्रीष्टकी कोर्ला ख्याप्ताक क्यासुड। १८ काड यिन्सिनाड खक्छ्येवु ताम्डे ति दी यिन। तिवी सेम टेङ्बुकी ख्याप्ताक क्यासिनाड, सेम मेटेङ्बुकी क्यासिनाड ख्रीष्टकी कोर्ला राड ख्याप्ताक क्यावु यिन। तीकी थोकला ड छासे गा लानी वे। तमा नरी गा कितिन। १९ च्यिलासिसिन ख्यिरा क्यावु मोपोर ताड येशू ख्रीष्ट नेमा वावु थु चाङ्माकी दाल्जा क्यानी ड दी चोन्खाड ने थर थुक्किवी सिरुप ति डला छ्या वे। २० डे खक्छ्येवुला कि राड गोवु लाका ताड रेवा ति दी यिन। ड नाम्साड डोछाला माख्येलनी छासे डाडेड इयेनी शिसिनाड सेन्बु वोसिनाड नरी दोके तन्दा साड डे

मिजी ति ख्रीष्टकी थोकला मोवा कितुप डोशी।

२१ च्यिलासिसिन ड मिजी क्योङ्गुप ति ख्रीष्टकी थोकला यिन, तमा शेप साड डे थोकला ख्येप्साड यिन। २२ दोजो ड सेन्बु लुसिन ख्रीष्टकी थोकला मड लाका ल्यामु कितुप डिवी। यिने ड शिते सेन्बु लुकिते चुका ति बे गोकिवी ती ति डला छ्या मे। २३ तुक क्यानी ड काड कितुप काड कितुप गल वे। डला याड जम्बुलिड क्युर ज्याकनी ख्रीष्टकी चिप्ला राड देतुप नो वे। डला ती राड ल्यामु यिन। २४ यिन्सिनाड ड ति ख्यिरा थोकला राड सेन्बु लु गोकिवी। २५ दी ताम्डे ति तेन्तेन हाक्कोनी ड सेन्बु देतिन। ख्यिराड येशूला तेपा क्यानी येर्के डोप ताड गा किशी सिनी ड ख्यिराड तेरीकी मुला नरी देतिन। २६ तुक क्यानी ड येलुड ख्यिरा ते वुङ्गुप पेला ख्यिरा डे थोकला येशू ख्रीष्टला मड सोवा देक थुक्किवी।

२७ त खक्छ्येवु ताम्डे ति दी राड यिन, ख्यिरा मिजी ति ख्रीष्टकी लेन ल्यामुला सुङ्गुप दोके च्युङ्शी। तुक क्यानी ड ख्यिरा ते वोसिनाड माङ्गुसिनाड ख्यिराड सेम च्यक्पा राड च्युङ्नी डेकला देतुप ताड लेन ल्यामुला वोतुप तेपाकी थोकला मुला राड हुर्ताक क्यावु ति डे थो थुप्शी। २८ तमा ख्यिराड रङ्गी डतिवी काड क्यासिनाड ज्यिवा माकी। तुक

क्यासिन ख्यिरा डतिवा फम्बुप ताड
ख्यिराड ति दिक्पा ने थरुप त छ्या
देन्गिबी। ती थर्वा ति कोन्छ्योककी
नङ्गिबी। २६ च्यिलासिसिन ख्यिराड
ख्रीष्टला तेपा कितुप तिराड मिन,
यिने खोकी थोक्ला दुक्पा साड खुर
गोकिवी। तुक कितुप ति ख्रीष्टकी
नङ्गुप कटिन यिन। ३० तमा डे कशेन
दुक्पा खुरूप ति ख्यिरा थोड वे।
तन्दा साड ड ती दुक्पा राड खुरिन
वोतुप ति ख्यिरा थोनी वे, ख्यिरा
साड डे दोके राड क्यानी ती दुक्पा
ति खुरिन वे।

ख्रीष्टकी दोके मिजी क्योङ्गुप

२ दोजो येशू ख्रीष्टला तेपा
क्यासिमा ख्यिरा मिजीला
काड टोङ्गु वोसिन, याङ्ना खोकी
ड्यिङ्ज्येकी लोदिमु च्युड वोसिन,
याङ्ना कोन्छ्योककी थु चाङ्माकी
ओडला डिकजोम च्युङ्नी तम्जी ल्यामु
वोसिन, याङ्ना ख्यिरा मिजीला मी
यम्बी थोक्ला सेम ल्यामु ताड च्यम्बा
वोसिन, २ ख्यिराड सेम च्यक्पा राड
च्युङ्गुप ताड ड्यिङ्ज्ये च्यक्पा राड
कितुप ताड नासाम च्यक्पा राड
तोङ्गुप ताड तेरी थिन्नी डला कशेन
गा लोड। ३ खोरो थोक्ला तिराड
नासाम तोङ्गुप ताड अम्बारडिशड
कितुप मिन, यिने कुसु ज्यम्बु क्यानी
च्यिककी च्यिकला खुरुड सिनाड
छ्ये यिन सिनी नो की। ४ ख्यिराड
रङ्गी थोक्ला तिराड नासाम मातोड,

यिने मी यम्बी थोक्ला साड नासाम
तोड। ५ ख्यिरा सेम ति येशू ख्रीष्टला
वोतुप दोके वुड गोकिवी।

६ खो ति कोन्छ्योककी जुजमला
वोसिनाड

खो कोन्छ्योक ताड मुला

च्यक्पा राड यिन सिनी

खोकी ओड छोलुप नो माक्या,

७ यिने तेरी क्युर ज्याकनी लावाकी

जुजमला च्युङ्नी

दाक्पु दोके क्यानी दी

जम्बुलिडला क्येसुड।

८ तमा खोरुडला मो पाप्नी शि राड
गोसिनाड

कोन्छ्योककी कला ड्येन्सुड।

तीकी तेन्दोक ति ग्यडिशडला

कल्नी टुङ्गुप यिन।

९ ती तप्की कोन्छ्योककी खोला

छासे चोछ्ये जो नाङ्नी

तेरी सिनाड चोछ्ये वोतुप मिड

ज्याड नाङ्सुड।

१० तुक क्यानी देवाच्येनला

वोतुपतिवा ताड

जम्बुलिडला वोतुपतिवा

ताड जम्बुलिडकी वोक्ला

वोतुपतिवा

तेरीकी येशूकी मिडला ताङ्देन

कितुपला पुमुड जुकिवी।

११ तमा पपा कोन्छ्योककी मोवाकी

थोक्ला

तेरीकी ख नेमा येशू ख्रीष्ट राड

चोवो यिन सिनी

मी मिङ्गाला खलाड किवी।

जम्बुलिङला कर्मा शरुप दोके च्युङ्गुप कोर्ला

१२ती तप्की डे डियङ्ज्येवु
अच्युनुपतिवा, ड ख्यिरा मुला वोतुप
पेला ख्यिरा डे खला ड्येन्मुड।
ती दोके त ड मेतुप पेला मड डे
ताम्डे ड्येन्नी सेमला ज्यिवा खुर्नी
कोन्छ्योकला ताङ्देन क्यानी खोरुड
दिक्पा ने थरुप लाका तेरी सिन्दा
कितुपला टेमु किसान। १३च्यिलासिसिन
कोन्छ्योककी ख्यिराङला खोरे
नोवाला वोतुप दोके कितुप नासाम
तोङ्गुप ताङ ती दोके लाका कितुप
ओङ नाङ्नी ख्यिरा मिजी नेमा लाका
कियी वे।

१४तमा ख्यिराङ काङ किसिनाङ
मुक्तम देन्दुप ताङ खाँदा माक्यानी
किसा। १५तुक क्यासिन ख्यिराङ
क्येन मेतुप ताङ टेङ्बु च्युङ्नी
सुक्योक्पा ताङ ख्यम गलुप मीतिवी
पर्ला मडी मेतुप कोन्छ्योककी गिपा
च्युङ्गिगी। तमा ख्यिराङ कर्मा शरुप
दोके वो ग्यकिवी। १६मिजीकी सुङला
ख्यिराङ रम्बु क्यानी देता, तमा डे
लाका ताङ हुर्ताक क्यावु ति तेर्मेला
मोडोवी। तुक क्यासिन ख्रीष्ट फेवु
तुजेला ख्यिराङ को छ्येवु तप्की डे
सेमला छासे गा लङ्गिगी। १७ख्यिरा
कोन्छ्योकला तेपा क्यावु ताङ
शब्ज्यी क्यावु ति जिन्बा बुलुप दोके
राङ यिन। ती जिन्बाकी थोक्ला ड
शि राङ गोसिनाङ शि थुक्किवी। तमा

ख्यिराङ तेरीकी मुला ड छासे गा
कितिन। १८तुक राङ क्यानी ख्यिराङ
साङ ड ताङ मुला राङ छासे गा कि
गोकिवी।

तिमोथी ताङ इपाफ्रोडिटसकी कोर्ला ताम्डे क्यावु

१९येशू ख्रीष्टकी नोवा वोसिन
तिमोथीला डमु राङ ख्यिरा ते
तोङ्गुप्नो। तुक क्यासिन ख्यिरा
लेन थोनी डला गा लङ्गिगी।
२०च्यिलासिसिन तिमोथी दोके सेम
टेङ्बु क्यानी ख्यिरा थोक्ला पप
कितुप मी ति डे मुला सु साङ मे।
२१मी यम्बातिवा याङ येशू ख्रीष्टला
मिन, यिने खोरो थोक्ला तिराङ नासाम
तोङ्गिनोक। २२यिने तिमोथी खोङ्तेर्मु
वोतुप ति ख्यिराङला साङ छ्या वे।
तीकी चुक क्यानी पुज्युङकी पपाला
शब्ज्यी किवे, तुक राङ क्यानी ड ताङ
मुला लेन ल्यामु ख्याप्टाक कितुपला
दाल्जा क्यासुङ। २३तुक क्यानी डला
चोन्खाङ नेमा पि तोङ्गुप मोतोङ्गुप
तेन्तेन च्युङ्गुलुङ्मे तिमोथीला ख्यिरा ते
तोङ्गुप नो क्या वे। २४चोवो येशूकी
नोवा वोसिन ड साङ डमु राङ ख्यिरा ते
वुङ थुप्शी सिनी चोवो कोन्छ्योकला
रेवा क्या वे।

२५डे नासामला इपाफ्रोडिटसला
ख्यिरा ते तोङ गोवु डे थोङ्सुङ। ती ति
डे नुप दोके क्यानी डे मुला राङ लाका
क्यासुङ, तमा लेन ल्यामु ख्याप्टाक
कितुपला थमु ग्यकुप मक्मी दोके

च्युड्सुड। तीकी ख्यिरा लेन ति डला
खुर्नी लेसुड, ती ति डला दाल्जा
कितुप थोक्ला ख्यिरा डे ते तङ्गुप
यिन। ^{२६}च्यिलासिसिन तीकी ख्यिराड
तेरीला छासे ठेतुप नोकिनोक। तमा
ती अमोछ्योवु हाक्कोनी ख्यिराड
तीकी थोक्ला सेम्दुक क्यावु थोसिमा
ती ति मड यर्मिन मर्मिन गाल्सुड।
^{२७}वुतुड के ती ति च्येती नासुड,
यिन्सिनाड कोन्छ्योककी तीला
च्यम्बा नाड्सुड। तीला तिराड
मिन, डला पप लावु खला साड पप
मलाङ्गी सिनी कोन्छ्योककी च्यम्बा
नाड्सुड। ^{२८}ती तप्की तीला ख्यिरा
ते तोङ्गुप डला छासे नो वे। तीकी
तेन्दोक ति तीला थोडिसमा ख्यिराड
गा किवी। तमा डला साड पप अला
मलाङ्गिगी। ^{२९}चोवोकी मिडला
तीला छासे गा क्यानी गासो शुसा।
तमा तुका मीतिवाला ताड्देन किसान।
^{३०}च्यिलासिसिन तीकी ख्रीष्टकी
थोक्ला शि राड गोसिनाड लाका
क्यासुड, तमा डे थोक्ला ख्यिरा कि
मुथुपु शब्ज्यी कितुपला तो मिसिन
शिसुड।

जुला कितुप लुकसुला तेपा माकी

३ अच्युनुपतिवा, तिङ्मी ताम्डे
यम्बा ति काड यिन सिसिन
ख्यिराड चोवोला तेपा क्यावु मी
यिन्दुप तप्की सेम गा की। दी यिकी
लोकुर ग्यप्नी टिकुपला डला छेरा
मलङ्गिगी, ती ति ख्यिराडला

ज्होकुपला यिन। ^२फेतुप की दोके
क्यानी थमु ग्यकुप ताड लाका दुक्टा
कितुप ताड दिक्पा ने थरुपला जुला
च्येतुप लुकसु कि राड गोकिवी सिरुप
मीतिवा नेसुर च्याङ्से देता। ^३दाक्पु
ति कोन्छ्योककी थोड्दाडला वुतुड
के च्येतुप लुकसु क्यावु मीतिवा
यिन। च्यिलासिसिन दाक्पु याड
कोन्छ्योककी थु चाङ्मा नेमा खोला
सोवा देकिवी, तमा येशू ख्रीष्टला तेपा
क्यानी तेके किवी, जुला तिराड कितुप
लुकसुला ति तेपा मिकिवी। ^४ताम्डे
कितुप यिन्सिन, ड साड तुका जुकी
ताम्डेतिवाला तेपा कि थुप्किवी।
दोजो मी ललाङ्की जम्बुलिङ्की
लुकसुतिवाला तेपा किवी सिसिन ड
याड मड ती ताम्डे कि थुप्किवी।
^५ड क्येवु डियमा ग्येला यहूदी च्येतुप
लुकसु क्यावु यिन, तमा ड इस्राएलकी
मी यिन, तमा बिन्यमिन गिपाकी मी
यिन, तमा वुतुड के हिब्रू मी यिन, तमा
यहूदी ठिमकी कोर्ला सि गोवु यिन्सिन
ड फरिसी यिन, ^६तमा टेमुकी कोर्ला
सि गोवु यिन्सिन येशूला तेपा कितुप
मीतिवाला डे छेटाड बिन्दुप यिन,
तमा यहूदी ठिमला वोतुप टेङ्बुकी
कोर्ला सि गोवु यिन्सिन ड ति क्येन
मेतुप मी यिन।

^७यिने ती तेरी ताम्डेतिवा डे थोक्ला
ख्येप्साड वोतुप यिन्सिनाड ती
ताम्डेतिवा तन्दा ख्रीष्टकी थोक्ला
तेरी काड साड मिन सिनी ड नासाम
तोडियन। ^८तोजो तिराड मिन, चोवो

येसू ख्रीष्टला डो शेवु ति तेरी सिनाड खक्छयेवु यिन्दुप तप्की यम्बा तेरी ताम्डेतिवा कुन यिन्दुप ति डे हाक्कोसुड। तमा ख्रीष्टकी थोक्ला तेरी ताम्डेतिवा क्युनी ज्याकिन। तमा ती ताम्डेतिवा तेरी ज्यरा ज्यिरा दोके यिन सिनी नोक्यायी। तुक क्यानी डे येसू ख्रीष्टला ड्ये थुप्शी, ६तमा खो ताड मुला च्यिक्पा राड च्युड थुप्शी। येलुड ठिमला तेन्नी टेड्बु यिन सिनी ड नो मिकी, यिने तन्दा येसू ख्रीष्टला तेपा क्यासिमा वुङ्गुप ति वुतुड के टेड्बु यिन। ती ति येसूला तेपा क्यासिमा कोन्छ्योक नेमा वुङ्गुप टेड्बु यिन। १०डला गोवु तेरी ताम्डेतिवा ति दी यिन, ख्रीष्टला डो शेवु ताड खो टुङ्नी डोसु लावु ओड ति हाक्कोवु ताड खोकी दाक्पी थोक्ला दुक्पा खुरुप दोके डे साड खोकी थोक्ला शि राड गोसिनाड शि थुप्शी। ११तमा च्युडिसन ड शिसिमा शेप ने सेन्बु लड थुप्शी।

छ्यक्तक थोपुपला छ्योड्बाल ग्यपुपकी थोक्ला

१२ती तेरी ताम्डेतिवा डे गोमाला के ड्येनी वे सिनी सिक्पावु मिन, ती ताम्डेतिवा तन्दा तेरी च्युड वे सिक्पावु साड मिन, यिने येसू ख्रीष्टकी डला खोरो ति जो नड्सुड। ती तप्की ड ख्रीष्ट दोके मिजी क्योड थुपुपला छ्योड्बाल ग्यप्नी डोयी वे। १३ओ अच्युनुपतिवा, डला तन्दा साड ती थोप्नी वे सिनी नो मिकी, यिने ड लाका

च्यिक ति कितिन। ती ति काड यिन सिसिन गोमी ताम्डेतिवा क्युर ज्याक्नी तिङ्ला वुङ्गुप १४येसू ख्रीष्ट नेमा कोन्छ्योककी देवाच्येन नेसुर डला कताड नङ्गुप छ्यक्तक थोपुपला ड कशेन छ्योड्बाल ग्यप्नी डोयी वे।

१५तमा दाक्पु तेपा क्यानी रम्बु वोतुप मीतिवा तेरीकी तुकै नासाम तोड गोकिवी। दोजो ललाइ मीतिवी नासाम ति कुतुक कुतुक वोसुड सिसिन ती ति कोन्छ्योककी ख्यिराडला ठछ्येली छ्या देन्गिवी। १६काड यिन्सिनाड दाक्पु दे सेक लेप्नी वे, तीला राड रम्बु क्यानी मिजी क्योड्गुप।

१७अच्युनुपतिवा, डे काड क्यावे, ख्यिरा साड तुकै राड नरी लुमु से। तमा ड्यिरा मिजी नेसुर छ्या तेन्दुप दोके क्यानी मिजी क्योड्गुप यम्बा मीतिवाला ल्हानी लोपा। १८ख्यिराडला डे गोमाला थेड्मा बडी सिक्पायी, त येलुड ड डुयी सिरा सिरिन। काड यिन सिसिन मीतिवा बडी ख्रीष्ट येसूकी ग्यडिङ्गडकी थोक्ला डला गल्नी युकिवी। १९तिवा डोप लाम ति ड्येलाला ना डोप यिन। च्यिलासिसिन तिवा कोन्छ्योकला मिन, साप ताड थुङ्गुपकी थोक्ला तिराड सेम नोजु किवी। तिवी खोप्ने क्यावु लाकातिवाला छासे ल्यामु यिन सिनी सिवी, यिने तिवी क्यावु लाका ति डोछा लोङ्गुप लाका यिन। तिवी जम्बुलिङ्गकी च्यालकतिवाला तिराड नासाम तोडिङ्गवी। २०यिने दाक्पु याड

देवाच्येनला वोतुप कोन्छ्योककी ग्येल्खापकी मीतिवा यिन। तमा दाक्पुला दिक्पा ने थर ज्यितुपला देवाच्येन नेमा फेपुप येशू ख्रीष्टला राड दाक्पु छासे गुनी देन वे। ^{२१}खोकी डारकी राड जम्बुलिडला वोतुप तेरी च्यालकतिवा खोकी ओडला ज्योक थुप्किवी। तमा खोकी ओड नेमा राड दाक्पी रुलुप जु ति खोकी मोवाला वोतुप जु दोके सम्बा फो ज्यिकिवी।

४ तुक क्यानी अच्युनुपतिवा, ड ख्यिराडला ड्यिङ्ज्ये लानी नम पेला ठेतुप सिनी नासाम शर्किनोक। तमा ख्यिराडला नासाम तोङ्गुप पेला ड छासे गा लानी मीतिवाला ख्यिरा कोर्ला तेके कितिन। डे ड्यिङ्ज्येवु अच्युनुपतिवा, ख्यिराड तुक राड क्यानी चोवो येशूला तेपा रम्बु क्यानी देता।

पावलकी टोङ्गु

^२इयोदिया ताड सुन्तुखेला ड छासे क्यानी गोड्बा शोयिन, ख्यिराड ड्यिकर चोवोकी मीतिवा यिन्दुप तप्की थिन्नी देता। ^३ड ताड मुला लाका ल्यामु कितुप दाल्जो, ड ख्युरुडला साड सिरिन। ती आम्पुमतिवाला दाल्जा किटे किसान। च्यिलासिसिन ड लेन ल्यामु ख्याण्टाक कितुप पेला तिबी क्लेमेस ताड डे मुला वोतुप यम्बा दाल्जातिवी मुला लाका टेमु क्यासुड। तमा कोन्छ्योककी तिबी मिड ति खोकी मिजीकी थेप नाङ्गला टि वे।

^४चोवो येशू ख्यिरा मुला ज्युवु तप्की ख्यिराड नरी सेम गा किसान। ड येलुड सिरिन, ख्यिराड सेम गा किसान।

^५ख्यिराड च्यिङ्च्यु सेम्बा वोतुप ति तेरी मीतिवाला छ्या तेन। नासाम तोडा, चोवो डमु राड फेपिन वोतो।

^६ख्यिराड काड साड पप माकी, यिने मोपोर कितुप पेला कोन्छ्योकला थुचिछे पुलनी ख्यिराडला गोवु तेरी ताम्डेकी थोकला खोला गोड्बा शु।

^७तुक क्यासिन मी नासाम तङ्गुप सिनाड ल्हक्पा वोतुप कोन्छ्योककी लोदिमुकी ख्यिरा सेम ताड नासाम ति येशू ख्रीष्टकी ओड नेसुर ज्होकितो।

^८तेरी सिनाड तिङ्गला अच्युनुपतिवा, चुका ताम्डे ति टेङ्बु नोके, चुका ताम्डेला ताङ्गदेन कि गोवु नोके, चुका ताम्डे टेके नोके, चुका ताम्डे ति क्यान मेतुप नोके, चुका ताम्डे ति ड्यिङ्ज्येवु नोके, चुका ताम्डे ति चिताड कि गोवु नोके, तीला राड नासाम तोड। दोजो ललाइ छ्ये ताड टेन छ्योवु वोसिन ती ताम्डे ति ल्यामु नासाम तोडा। ^९ख्यिरा चुका ताम्डे ति डे नेसुर लाप्वे, चुका ताम्डे ति सेमला लावे, चुका ताम्डे ति डे ख नेमा थोवे, चुका ताम्डे ति डे मिजीला थोङ्गे, ती दोके राड की। तमा लोदिमु नङ्गुप कोन्छ्योक ख्यिरा मुला ज्युकितो।

बुल्वाकी थोकला थुचिछे पुलुप

^{१०}ड्यिमा चेयी ज्युक्ला येलुड ख्यिरा डला ड्याम क्यावु थोङ्गनी चोवो येशू

नेसुर ड छासे गा लानी वे। वुतुड के
ख्यिरा डे थोक्ला पप किनोक, यिने
ख्यिरा डला दाल्जा कितुप छल्सिनाड
तुजे माच्युङ्गनोक। ११ कतुकारला
ख्येल्सुड सिनी डे किदुक शेतुप
मिन, यिने चो पेला साड लोदिमु कि
गोकिवी सिरुप ति डे लापिन। १२ डे
लोला बडी वोसिनाड मेसिनाड, चुक
क्यानी मिजी क्योड गोकिवी सिरुप ति
डला छ्या वे। डावु पेला ताड ल्होवा
कोम्बाला ताड, बडी वोतुप पेला ताड
कतुकारला ख्येलुप पेला ताड, चो पेला
साड लोदिमुला देतुप ति डे लापिन।
१३ च्यिलासिसिन ख्रीष्टकी नङ्गुप डार
नेसुर राड ड तेरी ताम्डे कि थुक्किवी।
१४ यिन्सिनाड डला छेटाड ख्येलुप
पेला ख्यिराड डे मुला राड दुक्पा खुटे
क्यानी छासे ल्यामु क्यासुड।

१५ थल्माला लेन ल्यामु ख्याण्टाक
कितुपला ड माकेडोनिया नेसुर
क्येनी डोप पेला ख्यिरा मिसिन यम्बा
चर्चकी मीतिवा सी साड डला दाल्जा
किटे माक्या। ती ताम्डे ति ख्यिराड
फिलिप्पीतिवाला साड छ्या वे।
१६ ख्यिरा याड ड थेसलोनिकेला वोतुप
पेला साड थेङ्मा च्यिक चोयी ड्यी
चोयी डे थोक्ला दाल्जा किटे क्यासुड।

१७ डला बुल्वा गोकिवी सिक्कावु
मिन, यिने कोन्छ्योककी ख्यिराडला
मोलाम नङ्गुप ति ल्हाप नोनी डे
ती ताम्डे सिक्कावु यिन। १८ ख्यिरा
इपाफ्रोडिटसला कल्नी तङ्गुप बुल्वा
ति डे लकला ख्येल्सुड। ती बुल्वातिवा
डे थोप गोवु सिनाड मड यिन। ती ति टी
जङ्बु खाप पो दोके ताड कोन्छ्योकला
गा लङ्गुप ताड खोकी सेमला डोप
जिन्बा दोके यिन। १९ डे कोन्छ्योककी
खोरे मोवाला वोतुप ग्यक्चेकी टोङ्बा
ति येशू ख्रीष्ट नेमा ख्यिराडला ख्येलुप
कतुकारतिवा तेरी डुप ज्यिकिवी। २० त
याड दाक्पी पपा कोन्छ्योकला नरीकी
नरी मोवा वुङ्शी। आमिन।

पावलकी तिङ्मी टसी देलेक

२१ येशू ख्रीष्टला तेपा कितुपतिवा
तेरीला टसी देलेक वे सिनी सिसा। डे
मुला वोतुप नुपतिवी साड ख्यिराडला
टसी देलेक सिनी तड वोतो। २२ दे
वोतुप येशू ख्रीष्टला तेपा कितुप
मीतिवा तेरी ताड खक्छ्येवुला रोमी
ग्येल्वी ग्येल्खाडकी मीतिवी साड
ख्यिराडला टसी देलेक सिनी तड
वोतो। २३ चोवो येशू ख्रीष्टकी कटिन
ति ख्यिरा सेमला वुङ्शी।

